


DECLARATION

DV ROY EN FORME

D'EDICT SVRCE QV'IL A PLEV

à sa majesté accorder aux habitans
de sa Ville & Cité de Sens, s'estans
remis en son obeyssance.



A PARIS,

Par FEDERIC MOREL, Imprimeur
ordinaire du Roy.

1 5 9 4.

Avec Privilege dudit Seigneur.

Case
F

39

.326

1594fd

THE NEWBERRY
LIBRARY

EDICT DV ROY OCTROYE'
aux habitans de sa Ville & Cité de Sens.



ENRY par la grace de Dieu Roy de France & de Nauarre, A tous presens & à venir, salut. Puis qu'il a pleu à Dieu inspirer au cœur de noz bons & fidelles subiects, les habitans de nostre ville de Sens, secoüant le ioug de toutes ambitions & passions; ausquelles depuis le commancemēt des presens troubles ils ont esté asseruis; la volonté de se ranger à l'obeissance que Dieu, la nature & les loix fondamentales de ce Royaume les obligent de nous rendre, Nous esperons avec la grace d'iceluy par bons & fauorables effects leur faire ressentir le bien, repos, soulagement & contētement qu'ils se sont promis de nostre reconnoissance, en laquelle les voulans conformer & lier par tous les biens faits & gratifications qu'ils peuuent desirer de nous, & d'ailleurs leur donner toute assurance de l'exécution de ce que leur auons promis lors de leur réduction, inclinans à leurs treshumbles supplicatiōs & requestes: De l'aduis des Officiers de nostre Couronne & autres notables personnes de nostre conseil estans à present pres

nous, Auons dict, statué & ordonné, disons, statuons & ordonnons ce qui s'ensuit.

I.

Premierement, que dedans nostre ville & faux bourgs de Sens, ne se fera aucun exercice de Religion que de la Catholique, Apostolique & Romaine, ne és autres villes & lieux defendus par l'Edict de pacification, de l'an mil cinq cens soixante & dixsept, Declarations par nous faictes pour l'execution d'iceluy : Lesquels nous voulons estre aussi obseruez pour la prouision des Offices. Defendons tresexpressément à toutes personnes de ne molester ou inquieter les Ecclesiastiques en la celebration du seruice diuin, iouissance & perception des fruiets & reuenuz de leurs benefices, & de tous aultres droicts, deuoirs, priuileges, franchises, immunitiez qui leur appartiennent. Voulons & ordonnons que tous ceux qui depuis ces troubles se sont emparez des Eglises, maisons, biens, & reuenus appartenans ausdicts Ecclesiastiques, en quelque part de nostre royaume qu'ils les detiennent & occupent, leur en delaissent l'entiere & libre disposition & iouissance, avec tels droicts, seuretez, & libertez, qu'ils auoient au parauant qu'ils en fussent deffaisis.

Et desirant particulierement gratifier les Ecclesiastiques de nostredite ville & fauxbourgs de Sens, Auons ordonné, & ordonnons par ces presentes qu'ils serót tenuz quitres & deschargez, comme nous les quittons & deschargeons de ce qu'ils peuuent deuoir du passé des decimes, dont sont chargez leurs benefices, iusques à la fin du mois de Decēbre dernier passé; sans qu'ils en puissent estre recherchez ne pourluyuis. Defendons tresexpressément à tous Receueurs d'yser d'aucunes contraintes sur eux, au preiudice de la presente exemption & descharge.

III.

Voulons pareillement, que lesdicts habitans tant Ecclesiastiques que autres, soient remis, maintenus & conseruez en la libre & paisible iouyssance de tous leurs anciens priuileges, franchises, libertez, & immunitiez à eux concedez par les Roysnoz predecesseurs, ainsi qu'ils en auoyent au parauant ces troubles, bien & deuément iouy. Et pour le regard des dons & octrois qui leur ont aussi esté faits par nosdits predecesseurs, Nous les auōs confirmez, & confirmōs pour estre employez aux effects, & leur en seront expediees lettres

de confirmation pour neuf ans , conformes aux precedentes , faisant apparoir d'icelles. Auons aussi eu agreable la treshumble requeste que lesdicts habitans nous ont faite, de les descharger à l'aduenir du Gouverneur, & garnisōs. Et neantmoins de leur cōsentemēt pour la seureté & conseruation de nostreditte ville de Sens, & la necessité du tēps, & tant qu'elle durera, dōné & oōtroyé, donnōs & oōtroyōs au sieur de Bellan, le gouuernement de ladite ville, & du pays circonuoisin, l'Estat & apoinement duquel se prendra & perceura sur les Tailles de nostre eslection de Sens.

III.

Seront par mesme moyen les Iustices tant ordinaires qu'extraordinaires, qui auoyent accoustumé d'estre establies & tenuēs en ladite ville, avec les anciēss ressorts des Bailliages, siege presidial, ensemble la Preuosté, Eslection, Maires, Escheuinage, Mareschaussée, Consuls, Magasin à sel, & tous autres Offices de Iustice ou finances, remis & reestablis, comme nous les remettons & reestablissons en ladite ville, en la mesme forme & maniere qu'elles estoient au parauāt celsdicts troubles: ordonnons pareillemēt que tous Officiers Royaux, pourueuz par nous, ou noz predecesseurs,

puissent rentrer en l'exercice plein & entier de leurs Estats, Offices, & charges, en faisant les submissiōs & serment de fidelité, pardeuant nostre Bailly de Sens, ou son Lieutenāt general, qui les receura, sans qu'il leur soit besoin d'obtenir autres declaratiōs, reſtabliſſement, ou mandement plus ſpecial que ces preſentes.

V.

Et voulans comme nous iugeons eſtre neceſſaire, pourueoir au ſoulagement deſdicts habitans de noz ville & faux-bourgs de Sens, nous leurs auons volontairement quitté, & remis, & leur quittons & remettons ce qu'ils peuuent deuoir des Tailles, ſubſides, impoſitiōs, & leuées ſur eux faites, tant de noſtre part que d'autre contraire: depuis le commencement des preſens troubles, iuſques à la fin de Decembre dernier paſſé: excepté toutefois pour ce qu'ils nous doiuent du taillon & entretenement des Preuoſts des Mareſchaux. Et defendons à tous noz Receueurs & autres perſonnes quelles qu'elles ſoyent, d'en faire aucune demāde, poursuite, ou inſtāce enuers leſdicts habitans, en general, ne particulier.

V I.

Et pour l'aduenir nous leur auons fait, & faſons don & deſcharge de toutes Tailles,

creuës, & impositions durant deux années, qui se prendront és quatre prochaines consecutiues, reseruant pareillement le taillon, & entretenement desdicts Preuosts des Mareschaux. Entendons pareillement que tous Arrests, Commissions, Decrets, Sentences, Iugemens, Contrac̃ts, Instructions de proces, & tous autres actes de Iustice faicts entre ceux de mesme party durant les presens troubles, ayent lieu & sortent effect.

VII.

Ordonnons en outre que tous lesdicts habitans tant Ecclesiastiques que autres, de quelque estat, qualité, & cõdition qu'ils soyent, puissent & leur soit loysible des maintenant, de rentrer en la libre & entiere possession & iouyssance de tous leurs biens, heritages, rētes, & reuenuz, de quelque nature & en quel que lieu qu'ils soyent situez & assis. Et que les dons & dispositiõs qu'on pourroit auoir fait d'iceux, depuis le premier iour de Ianuier, mil cinq cens quatre yingts & neuf, iusques à present, demeurent nulz desormais, & de nul effect: les ayans cassez & reuocquez, comme nous les cassons & reuocquons, ensemble les Arrests & saisies, faits sur lesdicts biens. Nonobstant toutes promesses, obligations: mesmes

mes des Fermiers, Laboureurs ou autres non acquitées, reellement & aétuellement, qui demoureront pareillement nulles, & de nul effet, en vertu de nostre present Edict, sans qu'il soit besoin ausdicts habitans obtenir de nous autres declarations, & mainleuées, particulieres.

VIII.

Leur permettans aussi de repeter ce qui leur auroit esté mal pris & retenu au preiudice du benefice des Tréues : ensemble de se faire payer & rembourser des deniers sur eux leuez, par forme d'emprunts particuliers par les Maires & Escheuins, Procureurs, & Receueurs de la ville de Sens, qui estoient lors en charge. Et pour donner moyen à ladite ville de sortir des debtes dont elle est tenuë & obligee, tant à l'occasiõ des guerres que autres frais, Auons permis, & permettons aux habitans d'icelle, qu'ils puissent faire leuer & prendre sur chascun minot de sel, vendu au magasin & grenier à sel dudit Sens, cinq sols tournois, & deux sols sur chascun muid de vin, passant soubz les ponts de ladictte ville, durant le temps & espace de trois ans.

IX.

Voulons aussi & nous plaist que la memoire de tout ce qui s'est passé en ladite ville & au

dedans le gouuernement d'icelle, tant en acte d'hostilité & exploits de guerre, prise d'armes, leuées de troupes & compagnies, establissement d'estappes, fonte de canon, façon de salpestre, & poudre à canon, couppez de boys, sieges de villes, demolitions de bourgades, maisons, Chasteaux, Ponts, & forteresses, prises de deniers, tant es coffres de sadite Majesté que des particuliers, impositions, leuées & dispositions de Tailles, taillon, aydes, subside, emprunts, subuentions, magasins, & autres sentences de mort, donnees par la forme & autorité de la Iustice & autres choses quelsconques entreprinſes audit Sens, depuis ces presens troubles, & à l'occasion d'iceux, soit & demeure pour iamais assoupis, estaints & abolis, sans qu'il s'en puisse faire a l'aduenir aucune recherche & poursuite contre le general ou particulier desdits habitans, en quelque sorte & maniere que ce soit: imposans sur ce silence perpetuel à noz Aduocats, & Procureurs generaux, & particuliers, presens, & à venir, & à toutes autres personnes quelconques. **X.**

A la charge toutesfois que ceux qui auront receu lesdits deniers en rendront compte, esquels les ordonnances & quittances, tant des

Ducz de Mayenne & de Guyse, corps & conseil de ladite ville, que des Gouverneurs, seront passez & alloüiez sans difficulté, & en seront lesdits Estats dressez: ensemble les acquits cōmuniquez aux Maire, & Escheuins, estās de present en charge, & qui seront à l'aduenir en charge, pour les blasmer, si faire se doit, si non, les approuuer au par auāt que les monstrier aux Presidens, & Tresoriers generaux de France, Chambres des Comptes, & autres, ausquels la congnoissance en appartient.

X I.

Entendons en outre, que tous comptes qui pourroyent auoir esté ouys & passez, depuis ledit an, mil cinq cens quatre yingts neuf, soyent & puissent estre subjets à estre reueuz, & à ceste fin communiquez ausdits Maire, & Escheuins de ladite ville, pour les debattre ainsi que de raison: avec lesquels nous auons à cest effect commis, & commettons le sieur le Gras Tresorier general de noz finances en la generalité d'outre Seine & Yonne.

XII.

Et à fin d'euitier toute occasion de querelles & diuisions entre nosdits subjets, leur auons inhibé & defendu, inhibons & defendons par ces presentes de s'entre iniurier, reprocher,

outrager, de fait, ne de parolles, offenser, ne prouoquer l'un l'autre, pour raison de ce qui s'est passé, & que l'iniquité du temps a causé & permis: Ains se contenir & viure paisiblement ensemble, comme freres, amis & concitoyens: sur peine d'estre sur le champ, & sans autre forme de proces, punis & chastiez comme perturbateurs du repos public.

XIII.

N'entendons toutesfois comprendre au benefice de ce present Edict, ce qui a esté fait par forme de vollerie, & sans aduen: pour raison de quoy nous auons permis & permettons à toutes personnes, de se pourueoir par les voyes de Iustice, si bon leur semble. Comme aussi sont exceptez tous ceux qui se trouueront coupables de l'exécrable assassinat & parricide crime commis en la personne du feu Roy, nostre tres honoré sieur & frere, que Dieu absolue, ou de conspiration sur nostre vie, & pareillement la recherche & punition de tous crimes & delicts punissables entre gens de mesme party.

SI DONNONS en mandement à noz amez & feaux, les gens tenans noz Courts de Parlement, Chambre de noz Comptes, & Cour des Aydes, & à tous noz autres Iusticiers, Officiers & subiects qu'il appartiendra: que ces presentes ils facent lire,

publier & enregistrer, & le contenu garder & faire garder, obseruer, & entretenir, de point en point, selon sa forme & teneur: contraignant à ce faire & souffrir tous ceux qu'il appartiendra, & qui pource feront à contraindre par routes voyes deuës & raisonnables. Nonobstant oppositions ou appellations quelsconques, Edicts, Declarations, Arrests, Iugements, Lettres, Mandemens, Defenses, & autres choses à ce cōtraires, ausquelles nous auons pour ce regard derogé & derogeons, ensemble aux derogatoires des derogatoires y contenues. Car tel est nostre plaisir. Et à fin que se soit chose ferme & stable à tousiours, Nous auons faict mettre nostre seal à celsdictes presentes. Donnée à Paris, au moys d'Auril, l'an de grace, mil cinq cens quatre vingts quatorze. Et de nostre regne le cinquiesme.

Signé,

HENRY.

Et plus bas, Par le Roy, POTIER. Et à costé, *visa.*
Et sceelées du grand seal & armes de France, de cire verd, en lacs de soye rouge & verd.

Extrait des Registres de la Cour de Parlement.

Registrees, ouy sur ce le Procureur general du Roy, fait la cour inhibitions & defenses ausdicts Maire, Escheuins, manans & habitans, de continuer la leuee des Impositions de cinq sols tournou sur chacun minor de sel, & deux sols sur muid de vin, y mentionnez, apres les trois ans de la commission & octroy expirez: à Paris, en Parlement, le vingt-neufiesme Auril, l'an mil cinq cens quatre vingts quatorze.

signé,

IOVSSELIN.

B iij

Extraict des Registres de la Chambre des Comptes.

Registrees semblablement en la chambre des comptes, ouy le Procureur general du Roy, pour iouyr par les impetrans de l'effect d'icelles, ainsi qu'il est contenu au Registre sur ce faict; le sixiesme iour de May, l'an mil cinq cens quatre-vingts quatorze.

signé,

DE LA FONTAINE.

Extraict des Registres de la Cour des Aydes.

Registrees au Greffe de la cour des Aydes, ouy sur ce le Procureur general du Roy, pour iouyr par les impetrans de l'effect & contenu d'icelles: à la charge que lesdits Maires, Escheuins, manans, & habitans, ne feront aucunes leuees de deniers sur eux, sans lettres patentes du Roy, verifiees en ladicte cour, suyuant l'Arrest d'icelle du iourd'huy, à Paris, le douziemesme iour de May, l'an mil cinq cens quatre-vingts quatorze.

signé,

B O N N E T.



Tous ceux qui ces presentes lettres verront, Philippes de Senneton. Conseiller du Roy en son Conseil d'estat, Cheualier de son ordre, Capitaine de cinquante hommes d'armes de ses ordonnances, Lieutenant pour sa Majesté au gouvernement de Mets, Seigneur de la Verriere, Bailly & Capitaine de Sens, & les gens tenans le siege presidial y estably, salut. Sçauoir faisons que ce iourd'huy iudiciairement pendant l'expedition des causes du Bailliage de Sens, honorables hommes, Moyse Thierriat bourgeois, Maire, François Bellotin licentié

és loix, Aduocat audit Bailliage & siege presdial, Estienne Picard Bourgeois, Maistre Nicolas l'hermire, aussi Aduocat audit Bailliage & siege Presdial, & Oliuier Mailler aussi bourgeois, Escheuins de ceste ville, se sont presentez; & nous a esté par ledit Thierriat Maire, requis leur donner audience, laquelle à eux octroyee, nous a ledit Thierriat dit, que ledit Mailler l'un des deputez pour aller vers sa Majesté, n'agueres de retour, auoit apporté les articles & concessions accordees par sadiète Majesté, aux habitans & citoyens de cestedicte ville & fauxbourgs, en forme d'Edict & de Chartres, qui auoyét esté verifiees, tant à la Cour de Parlement, Chambre des Comptes, que Cour des Aydes, desquelles ils desireroient la lecture estre presentement faicte, & qu'elles feussent registrees és registres de ce Bailliage, pour y auoir recours. Oy sur ladicte requeste le Procureur du Roy qui y a adheré; icelle entherinant, Il est dict, que les lettres en forme d'Edict & de Chartres obtenues du Roy nostre souuerain Seigneur, apportees par ledit Mailler député & enuoyé à sadiète Majesté, à cest effect, avec les actes des verifications d'icelles, seront presentement leués, & apres registrees és registres du Greffe de ce Bailliage, pour y auoir recours, & le registrement fait estre remises entre les mains desdits Maire & Escheuins, pour par eux estre mis en la Chambre de ville, és archives d'icelle. Apres lequel registrement sera fait extraict par nostre Greffier, portant la substance du contenu en icelles, lequel extraict sera leu & publié par les carrefours & lieux accoustumez de cestedicte ville, & ce par le sergent trompette d'i-

celle: comme aufsi fera registré l'acte de ferment & fidelité, fait & presté à sa Majesté, tât par ledit Maillet, que honorables hommes Maistre Christofle L'hermite, Aduocat en cedit Bailliage, & Pierre du Tour marchât, Procureur & Receueur des deniers communs d'icelle ville, deputez par le corps & communauté de cestedicte ville vers sadicte Majesté à cest effect. Donné & fait audit Sens, par nous Robert Hemard Conseiller du Roy, Lieutenant general audit Bailliage, tenant l'audiance, assistans Maistre Iean Carrault, Claude Minagier, Iean Fauucler, Iacques Maillard, & Guillaume Bernard, Conseillers Magistrats audit siege: le vendredy dix-septiesme May, l'an mil cinq cens quatre-vingts & quatorze. Signé, MIGNOT.

*S E B. de la Faye à consilijs præfecturæ
urbicæ senonensis, carmen.*

I Nuiçti Senones rerum virtute potiti,
Dulcisonum carmen fundite cœlicolis:
Quorum sæpe prece innumeros Deus ipse labores
Et seruile iugum corpore, mente, fugat.
Quandoquidẽ ingenitum in vobis animauit amorem
Henricum in Regem, vósque subegit ei:
Haud dicti Pauli immemores, qui cuncta sub ipso
Quotquot sunt hominum mittere colla iubet:
Magnum ab eis etiam deferri poscit honorem
Regi, participes quos cupit esse poli.
Vtque æterna Dei maneant nos præmia, rerum
Authorem colimus, Francigenamque patrem.

*Nobilitas Senonum Romanos vicit in armis,
Ac Senonum Gallis subdita Roma fuit.*